

يجوز

برغم البعد وحشائي

وساكنائي

وبحضن كل يوم طيفك

يجوز كان اتفاق عابر

لكنه بيظل اتفاق

يجوز قلبك بيتمرد وبيكابر

على الوضع اللي حسه غياب

فقرر إنه يتناسى

يعيش اللحظة ويايا

فحس بأنه جوايا لقي الترياق

ف قولتي تكلمي القصة
تعيشي ف وهم إنه حبيب
يحرك تاني إشواقك
فينعش قلب كان ميت
لكن سرعان ما قلبك فاق
وحس بأن ترياقى ماهوش ترياق
فسيبتي سهمك المسموم فى شرياني
وقولتي فراق

يجوز تجربتك السابقة
مع الشخص اللي قولتي كئيب
فسدت ليكي كام شريان
ولما يوم قابلتيني

لقيتي ضحكة مروية من الأفراح

فقلبك راح

ورا الضحكة اللي مش صادقة

واهى صدّقة

تعيد النبض لعروقتك

عشان شرايينك المسدودة محتاجة

لحاجة تقلل الحمى

وتمحي تجلط النبض

اللي جوه وريد

فقلتي تعيشي حب جديد

لكن والله انا محمود

وعمري ما كنت "أسبوسيد"

يجوز قلبك بجد حقيقي كان بيدوب

لكنه بيقرأ فى الطالع

فحس باني مش ملكه

وده مكتوب

فبطل دوب

و شلتي قطعة السكر من القهوة

عشان ما تدوب

وسيبتي قهوتي مرة

يجوز إني فقير جدا

ومايصحش فقير زي

يوهم نفسه بالدره

يجوز كل إلي مش جايز

واللي عقلى كان رافض بانه يجوز

يجوز الأرض بتمطر

فتطفى النور من القمره

عشان الصبح متعتم

يجوز الليل بيتالم

مزغلل عينه خيط الضوء

فحس ف لحظة إنه عجوز

يجوز كل اللي مش جايز

أنا عايز

أعيش الوهم بإرادتي

واصدق كل أكاذيبك

واشوف الصورة بالمقلوب